

**Kalaallit Nunaanni qanorluunniit upperisaqarsinnaatitaaneq qulakkeerumallugu pisortat tapiisarnerat eqqarsaatigalugu upperisat sugaluurtulluunniit assigiimmik pisarnissaat pillugu apeqquteqaat aallaavigalugu oqallinnissamik siunnersuut.**  
(Inatsisartuni ilaasortaq Andreas Uldum, Demokraatit)

### **Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Inatsisartunut ilaasortaq Andreas Uldum pisortanit tapiissutitut tunngatillugu upperisat sugaluurtulluunniit assigiimmik pineqartarnissaat pillugu sammisamik pingaarutilimmik saqqummiussivoq. Naalakkersuisut apeqquteqaat aallaavigalugu oqallinnissamik siunnersuummut qujapput, tassami sammisaq amerlanernut nalinginnaasumik soqutiginarpat. Andreas Uldumip apeqquteqaat aallaavigalugu oqallinnissamik siunnersuutimini Tunngaviusumik inatsimmi paragraf 68 Kalaallit Nunaannilu Ilagiit aningaasalersorneqarneranni periaaseq eqqaavai. Andreas Uldumip aaqiissutissatut siunnersuutitut ilaatigut ilagiinnut akileraaruteqartitsilernissaq taakkartorpa taamaalilluni innuttaasut pineqartut Kalaallit Nunaanni Ilagiinnut ilaasortaanginnissamik toqqaasinnaalersillugit.

Inatsisartunut ilaasortap qanoq ililluta upperisat tamaasa aningaasaqarnikkut assigiimmik pisinnaanerivut apeqquteqaamminut nangitsissutitut apeqquserpaa Kalaallit Nunaanni qanorluunniit upperisaqarsinnaatitaavittoqarnersoq. Tamatumani Andreas Uldumip apeqquteqaammini qanorluunniit upperisaqarsinnaatitaaneq pisortanit tapiissutitut atassuteqartippaa Tunngaviusumillu inatsimmi paragraf 68 taakkartorlugu. Aalajangersagaq taanna upperisaqarnermi qanoq sammiveqarnek pillugu apeqqummut atatillugu aningaasaqarnermut tunngavoq. Namminersulernikkut Kalaallit Nunaanni Ilagiit tapersernejarnissaannut Nunarput pisussaalerpoq, taakkumi naalagaaffeqatigiinnermi ilagiinnut ilaammata ilagiinnillu tapersiinnissaq inatsisitigut atuuttussanngugaammat.

Tunngaviusumik inatsimmi § 68 ima paasineqassaaq ilagiinnut akileraarutit kisimik inummit namminermit tapiissutaammata nalinginnaasumillu akileraarutaanatik. Ilagiinnut immikkut akileraaruteqannginnatta inummit namminermit tapiineq pineqanngilaq taamaalillunilu Tunngaviusumik inatsimmi § 68-ip kalaallillu innuttaasut akileraartartuusut Kalaallit Nunaanni Ilagiinnut akiliutigisartagaasa akornanni aporaattoqarani. Allatut oqaatigalugu akileraarutigisartakkatsinni guutisiornermut aalajangersimasumut inuttut tapiisoqarnek ajorpoq.

Innuttaasut tamarnik arlaatigut Ilageeqarnermik atuisarput, tassami Ilageeqarnek arlalinnik suliassaqarmat. Ilageeqarnek assersuutigalugu inunngortunik nalunaarsuineramik suliassamik tamarniusumik, atsiinernik aternillu allannguineramik, kiisalu toqusunik nalunaarsuineramik inuiaqatigiinnut tamanut isumaginnittarput. Taamaammat Naalakkersuisut isumaqarput ilageeqarnerup iluani upperisamik upperisaqarnek upperisaqannginnerluunniit apeqqutaatinnagu ilageeqarnek innuttaasunut tamanut arlaatigut sullissisuusutut pineqartoq.

Taamaattorli allaffissornermik suliat ilaasa ilageeqarnerup suliassaqarfiannit nuunneqarsinnaanerannik Andreas Uldumip isumaliuteqarnera Naalakkersuisunit

isumaqatigineqarpoq. Tamatumunnga periarfissat sukumiinerusumik misissorneqassapput. Tamannali piviusunngortinneqassappat ilageeqarnerup pisortanit taperneqarnissamut inatsisitigut pisinnaatitaaffia allannngortinneqarnaviangilaq.

Ilagiinnut akileraartalernissap ajornartorsiummik taaneqartumik aaqqiissutaasinnaanera Andreas Uldumip eqqaavaa. Tamanna Inatsisartuni siusinnerusukkut misissorneqarlunilu eqqartorneqarsimavoq, ilaatigut 2008-mi oqaatigineqarluni tamanna Kalaallit Nunaanni Ilageeqarnermut periusissatut kissaatigineqanngitsoq. Tamatumunnga atatillugu Naalakkersuisut ilisimatitsissutigisinnaavaat Naatsorsueqqissaartarfik naapertorlugu innuttaasut amerlanersaat, tassa 95 %-it missaanniittut ilageeqarnermi upperisamik upperisaqarmata.

Taamatut oqaaseqarluta Inatsisartut oqallilluarnissaannik kissaappavut.